

BOSNA I HERCEGOVINA

FEDERACIJA BOSNE I HERCEGOVINE

SPORTSKO RIBOLOVNI SAVEZ BiH

SPORTSKO RIBOLOVNI SAVEZ F BiH

SAVEZ SPORTSKO RIBOLOVNIH DRUŠTAVA ZE-DO KANTONA

UGSR „BISTRO“ ZENICA



S T A T U T

UDRUŽENJA GRAĐANA SPORTSKIH

RIBOLOVACA „BISTRO“ ZENICA

ZENICA, 23.05.2017. GODINE

Na osnovu člana 27. stav 5. i člana 54. stav 1. Zakona o udruženjima i fondacijama (službene novine F BiH broj 45/02) , a u skladu sa članom 26. stav 2 Zakona o udruživanju i fondacijama, te Zakona o slatkovodnom ribarstvu F BiH (Službene novine broj 64/04 od 20.11.2004. godine, Skupština Udruženja sportskih ribolovaca „Bistro“ Zenica na svojoj sjednici održanoj dana **23.05.2017.** godine donosi:

STATUT

UDRUŽENJA GRAĐANA SPORTSKIH RIBOLOVACA „BISTRO“ ZENICA

I OPŠTE ODREDBE

Član 1.

Ovim Statutom uređuje se: naziv , sjedište, ribolovna zona na području ZE-DO kantona na kojem djeluje UGSR „BISTRO“ Zenica, ciljevi i zadaci, zastupanje i predstavljanje, osnivanje, prava i dužnosti, sticanje, raspologanje i korištenje ribolovnih voda i ribljeg fonda, sredstava, organi Udruženja, izbor organa, Skupština i njen djelokrug rada, Upravni odbor i njegov djelokrug rada, Nadzorni odbor, Disciplinski sud, planiranje i programiranje, sekretar, ribočuvar, stručni poslovi i evidencije, opšta akta, prestanak rada Udruženja i prelazne završne odredbe.

Član 2.

UGSR „Bistro“ Zenica (u daljem tekstu Udruženje) je obligaciona organizacija Udruženja UGSR „Bistro“ Zenica, kao zona na području ZE-DO kantona (član 5. Zakona o slatkovodnom ribarstvu F BiH), koji se slobodno udružuju radi cjelovitog korištenja zaštite i unapređivanja ribolovnih voda na području općine Zenica, vodotoka dijela rijeke Bosne od granice općine Kakanj do granice općine Žepče, lijeve pritoke - dio rijeke Lašve, Kočeva, Orahovički potok, Bistrička rijeka, Vrandučki potok, Đulanov potok, Klopački potok, Babišnica, Gračanički potok, Nemilska rijeka, Pepelarska rijeka, uključujući „Eko zonu Drivuša“ radi razvijanja sportskog i rekreativnog ribolova, te obavljanja drugih ciljeva iz ovog Statua .

Član 3.

Udruženje je nevladina, vanstranačka i samostalna organizacija čiji se rad zasniva na odredbama Zakona o slatkovodnom ribarstvu FBiH i Zakona o udruženjima i fondacijama građana F BiH.

II NAZIV, SJEDIŠTE, PEČAT I ZNAK

Član 4.

Naziv: Udruženje građana sportskih ribolovaca „Bistro“ Zenica

Skraćeni naziv je: UGSR „Bistro“ Zenica

Sjedište Udruženja: Bulevar Kulina bana 32

Tel/Fax 032/242-212

Pečat i štambilj Udruženja su:

Pečat Udruženja je ovalnog oblika dimenzije 30 mm i sadrži puni naziv Udruženja sa sjedištem. U sredini pečata je lik ribe.

Štambilj je četvrtastog oblika sa upisanim tekstom UGSR „Bistro“ Zenica.

Broj: _____/20_____

U Zenici dana: _____/20__

Tel/Fax _____

Veličina štambilja pravougaonog oblika sa visinom od 40 mm i sa širinom 75 mm.

Zastava Udruženja je plave boje. U gornjem dijelu je ispisan puni naziv Udruženja, a ispod njega u sredini zastave se nalazi grb Udruženja. Zastava je sa gornje i donje strane obrubljena zlatno/žutom trakom.

Znak ovog udruženja je grb koji simbolizira grad Zenicu sa rijekom Bosnom. Grb je heraldičnog oblika. Oznaka grada je sive boje sa zelenom pozadinom planina. U lijevom gornjem uglu grba je skraćeni naziv UGSR „Bistro“, a u podnožju toka rijeke Bosne „Zenica“ ispod kojeg je označena godina osnivanja udruženja 1923. godina. Veličina grba je 100 x 140 mm u formi grba udruženje ima svoju značku koja označava pripadnost građana ovom Udruženju.



ZNAK/GRB UDRUŽENJA

Amblem Udruženja se sastoji od znaka/grba i tekstualnog dijela ispisanog žutom bojom. Izrađen je na plavoj podlozi u obliku štita i omeđen žutim obrubom. U gornjem dijelu je ispisan tekst „Udruženje građana sportskih ribolovaca“ i godina osnivanja, a u donjem se nalazi ispis „Bistro“ Zenica.



AMBLEM UDRUŽENJA

Član 5.

Udruženje „Bistro“ Zenica ima svojstvo pravnog lica i stiče ga upisom u Registar Ministarstva za pravosuđe i upravu Zeničko – dobojskog kantona.

III - DJELATNOST, CILJEVI I ZADACI UGSR „BISTRO“ ZENICA

Član 6.

Djelatnost, ciljevi i zadaci UGSR „Bistro“ Zenica su:

- *upravljanje u skladu sa pravima iz Zakona o slatkovodnom ribarstvu F BiH i ovim Statutom;*
- *korištenje i zaštita ribolovne zone i područja, unapređenje i približavanje ribolovnih voda, zaštita od ispuštanja otpadnih voda i od krivolova;*
- *evidentira slučajeve eksploatacije pijeska i šljunka (pogotovo u periodu mrijesta) i obavještava nadležne organe;*
- *organizira, razvija i redovno održava sportsko – ribolovna takmičenja i razvija sportsko – ribolovni turizam, razvija sportski duh, eko kulturu, zaštitu, te organizuje školu sportskog ribolova za djecu i omladinu;*
- *organizuje i sprovodi sportsko – ribolovna takmičenja u skladu sa Programom rada, Kalendarom takmičenja i propozicijama koje utvrde SRS BiH, SRS F BiH i SSRD ZE-DO kantona;*
- *organizuje i oprema Ribočuvarsku službu u skladu sa odredbama člana 39., 40. i 41. Zakona o slatkovodnom ribarstvu Federacije BiH;*
- *razmatra i organizuje jedinstven režim ribolova na svojim vodama i utvrđuje visinu članarine i ribolovnice za obavljanje sportsko – rekreativnog ribolova;*

- organizuje edukaciju, pripremu i sprovođenje polaganja ribičkih ispita shodno članu 22. i 23. navedenog Zakona;
- u skladu sa finansijskim mogućnostima učestvuje na tradicionalnim, kantonalnim, federalnim, državnim i međunarodnim takmičenjima;
- preko svojih zastupnika u organima i tijelima SRS BiH, SRS F BiH i SSRD ZE-DO kantona i drugim organizacijama učestvuje u ostvarivanju zajedničkih interesa;
- radi i druge poslove i zadatke iz plana i programa UGSR „Bistro“ Zenica.

IV - PREDSTAVLJANJE I ZASTUPANJE

Član 7.

Udruženje „Bistro“ Zenica predstavlja i zastupa predsjednik Upravnog odbora, koji može opunomoćiti dopredsjednika ili sekretara da ga zastupa u odsutnosti. Predsjednik Upravnog odbora za svoj rad odgovara Upravnom odboru i Skupštini UGSR „Bistro“ Zenica.

V - NAČIN, STICANJE, KORIŠTENJE I RASPOLAGANJE SREDSTVIMA

Član 8.

Za pravilno korištenje i unapređivanje ribolovnih voda UGSR „Bistro“ Zenica prihod ostvaruje iz slijedećih izvora:

- *od prikupljenih sredstava za prodate članske karte i ribolovnice svojim članovima;*
- *raznih pomoći, sponzorstva, donacija, priloga, poklona i dotacija, vlastitih prihoda i na druge načine u skladu sa Zakonom;*
- *po mogućnosti iz budžeta Grada Zenice.*

Član 9.

Udruženje „Bistro“ Zenica ostvarene prihode koristi za finansiranje ciljeva i zadataka koji su utvrđeni u Finansijskom planu i programu. Svaka isplata pokriva se odlukom Upravnog odbora. Zaprimljena sredstva preko blagajne se uplaćuju na transakcijski račun. Naloge za isplatu potpisuju predsjednik ili dopredsjednik Upravnog odbora. Višak prihoda nad rashodima (dobit) raspoređuje Skupština po konačnom računu prilikom usvajanja završnog računa.

VI - ORGANI UGSR „BISTRO“ ZENICA

Član 10.

Organi Udruženja „Bistro“ Zenica su:

- Skupština;*
- Upravni odbor;*
- Nadzorni odbor;*
- Disciplinski sud.*

Član 11.

Izbor organa UGSR „Bistro“ Zenica:

Organi Udruženja biraju se na Skupštini. Mandat zastupnika u Skupštini je 4 godine sa mogućnosti jednog reizbora. Na sjednicama Skupštine UGSR „Bistro“ Zenica biraju se: predsjednik i dopredsjednik Skupštine, članovi Upravnog odbora, predsjednik i dopredsjednik Upravnog odbora, predsjednik i članovi Nadzornog odbora, predsjednik i članovi Disciplinskog suda.

Navedeni organi se biraju na prijedlog Skupštine i na poziciji na koju su izabrani mogu biti maksimalno 2 mandata.

VII - SKUPŠTINA UGSR „BISTRO“ ZENICA

Član 12.

Skupština je najveći organ upravljanja i odlučivanja i svoja prava i dužnosti vrši u okviru Zakona i Statuta. Skupštinu čine 30 zastupnika, članova Udruženja. Skupštinu saziva predsjednik Skupštine, a vanrednu pored predsjednika može sazvati 10 zastupnika, kao i Upravni odbor Udruženja.

Redovna Skupština se održava jedanput godišnje, a vanredna po potrebi. Zakazivanje Skupštine se vrši i roku od najmanje 7 dana, a zastupnici se obavještavaju pismeno. Skupština na sjednicama odlučuje punovažno ako je prisutna nadpolovična većina zastupnika. Odluke se donose ako je za njih glasalo 2/3 prisutnih članova. Na sjednicama Skupštine zapisnik vodi sekretar, a biraju se i dva ovjerivača zapisnika.

VIII - NADLEŽNOST SKUPŠTINE UGSR „BISTRO“ ZENICA

Član 13.

Skupština Udruženja:

- *usvaja Poslovnik o radu;*
- *usvaja Statut i negove izmjene i dopune;*
- *usvaja Izvještaj o radu Udruženja i Plan rada;*
- *usvaja Finansijski izvještaj i Finansijski plan;*
- *razmatra i usvaja završni račun i odlučuje o rasporedu dobiti;*
- *bira predsjednika i dopredsjednika Skupštine, predsjednika i dopredsjednika Upravnog odbora, Upravni odbor, Nadzorni odbora i Disciplinski sud;*
- *odlučuje o pohvalama, priznanjima i nagradama;*
- *donosi odluku o prestanku rada Udruženja.*

IX – SEKRETAR I RIBOČUVAR

Član 14.

Sekretar Udruženja može biti u stalnom radnom odnosu sa punim radnim vremenom, pola radnog vremena ili može raditi volonterski, a vodi administrativne i stručno-tehničke poslove i njene organe.

Ribočuvar Udruženja može biti u stalnom radnom odnosu sa punim radnim vremenom, pola radnog vremena ili može raditi volonterski, a radi na poslovima zaštite i unapređenja ribljeg fonda.

Sekretar i Ribočuvar za svoj rad odgovaraju Upravnom odboru Udruženja, a opis njihovih poslova je detaljno opisan u Pravilnicima o radu sekretara i ribočuvara.

X - UPRAVNI ODBOR UGSR „BISTRO“ ZENICA

Član 15.

Upravni odbor Udruženja je izvršni organ Skupštine i ima 11 članova. Radom Upravnog odbora rukovodi predsjednik. Mandat predsjednika, dopredsjednika i članova Upravnog odbora je 4 godine sa mogućnosti jednog reizbora.

Član 16.

Upravni odbor obezbijuje efikasno i uspješno organizovanje i poslovanje Udruženja u skladu sa Zakonom, ovim Statutom, odlukama i zaključcima Skupštine. Rad članova Upravnog odbora temelji se na principima lične i kolektivne odgovornosti.

Član 17.

Sjednice Upravnog odbora zakazuje predsjednik ili dopredsjednik ovog organa. Na sjednicama Upravnog odbora se vodi zapisnik, donose odluke i zaključci, te prijedlozi u skladu sa ovlaštenjima iz ovog Statuta i Zakona. Upravni odbor punovažno raspravlja i odlučuje ako na sjednici prisustvuje najmanje 6 članova. Odluke i zaključci su usvojeni ako za njih glasa 2/3 prisutnih članova.

Član 18.

Ako je član Upravnog odbora neaktivan i ne dolazi na zakazane sjednice, a o tome je bio uredno obaviješten, u saglasnosti sa predsjednikom Skupštine izvršit će se opoziv i kooptiranje novog člana iz reda zastupnika Skupštine Udruženja. Na prvoj sjednici Skupštine odlukom će se verificirati opoziv i izbor novog člana Upravnog odbora. Za svoj rad Upravni odbor odgovara Skupštini i Zakonom utvrđenim institucijama.

Član 19.

U nadležnost Upravnog odbora spada:

- *preduzimanje mjera i aktivnosti radi ostvarivanja ciljeva i zadataka iz plana i programa Udruženja;*
- *podstiče i koordinira rad svojih komisija;*
- *priprema Izvještaj o radu, Finansijski izvještaj i druge materijale za Skupštinu. Članovi Upravnog odbora koji su i članovi Skupštine ne mogu glasati po svojim izvještajima;*
- *Upravni odbor Udruženja predlaže o stimulacijama za rad predsjednika Upravnog odbora, sekretara, kao i ostalih članova Udruženja koji donesu dobit Udruženju. Upravni odbor predlaže visinu stimulacije;*
- *podnosi prijedlog plana i programa, kao i prijedlog finansijskog plana za narednu godinu;*
- *zaključuje ugovore iz nadležnosti i ovlaštenja u granicama sredstava po finansijskom planu;*
- *donosi investicione odluke i odluke o zaduženju u granicama finansijskog plana i zaduženja;*
- *predlaže Skupštini dodjelu priznanja i nagrada posebno zaslužnim članovima i drugim subjektima;*
- *organizira i provodi takmičenja utvrđena programom i kalendarom Udruženja, SSRD ZE-DO kantona, SRS F BiH i SRS BiH, te učestvuje i oprema takmičare u viši rang takmičenja i obezbijuje potrebna sredstva za ovu namjenu;*
- *radi i druge poslove iz svoje nadležnosti.*

XI - NADZORNI ODBOR

Član 20.

Nadzorni odbor ima tri člana koje bira Skupština iz redova članstva. Mandat predsjednika i 2 člana Nadzornog odbora je 4 godine sa mogućnosti jednog reizbora. Izbor i opoziv Nadzornog odbora vrši Skupština Udruženja.

Član 21.

Nadzorni odbor ima slijedeće nadležnosti:

- *da kontinuirano ili periodično vrši nadzor nad finansijsko – materijalnim poslovanjem Udruženja;*
- *da kontroliše namjensko trošenje finansijskih sredstava;*
- *da kontroliše da li su ostvareni troškovi pokriveni finansijskim planom i odlukama nadležnih organa;*
- *da podnosi izvještaj o izvršenim kontrolama u toku godine i posebno izvještaj o kontroli blagajničkog poslovanja i poslovanja po završnom računu;*
- *vrši i druge poslove i zadatke koji proizilaze iz ovog Statuta i Zakona o finansijsko – materijalnom poslovanju i odlukama i zaključcima Skupštine Udruženja.*

XII - DISCIPLINSKI SUD

Član 22.

Disciplinski sud čine predsjednik i dva člana. Biraju se na Skupštini iz reda članova Udruženja na mandat od 4 godine sa pravom još jednog izbora.

Član 23.

Disciplinski sud razmatra zahtjev Upravnog odbora i Nadzornog odbora, kao i pojedinih podnosioca prijava za pokretanje odgovornosti članova Udruženja, zbog povreda Zakona i o tome zauzima stav u skladu sa Pravilnikom o disciplinskoj odgovornosti. Raspravlja i odlučuje o žalbama iz svoje nadležnosti. Žalbe na odluke Disciplinskog suda u drugostepenom postupku rješava Skupština Udruženja.

XIII - KOMISIJE UPRAVNOG ODBORA

Član 24.

Upravni odbor ima svoje komisije:

- *Takmičarska komisija od 3 člana;*
- *Sudijska komisija od 3 člana;*
- *Komisija za zaštitu i unapređenje ribljeg fonda od 3 člana;*
- *Ekološka komisija od 3 člana;*
- *Komisija za normativna akta od 3 člana;*
- *Komisija za dodjelu priznanja od 3 člana;*
- *kao i druge komisije po potrebi.*

Mandat članova komisije je 4 godine sa pravom još jednog izbora. Pravilnikom o radu komisija će se detaljnije regulisati nadležnosti i obaveze komisija. Komisije imenuje Upravni odbor iz cjelokupnog članstva Udruženja.

XIV - JAVNOST RADA UDRUŽENJA

Član 25.

Rad Skupštine i njenih tijela, kao i rad Upravnog odbora je javan. Javnost organa i tijela obezbijeduje se naročito:

- *javnim održavanjem sjednica;*
- *blagovremenim informisanjem članova putem javnih glasila;*
- *stalnom saradnjom sa predstavnicima informisanja i objavljivanjem odluka organa na oglasnoj ploči Udruženja i ostalim javnim glasilima.*

XV - STRUČNI POSLOVI I EVIDENCIJA

Član 26.

Stručne poslove i evidencije u Udruženju vodi sekretar. Udruženje vodi slijedeće evidencije:

- *knjiga protokola – pošte;*
- *knjiga zapisnika sa registrima odluka Skupštine i Upravnog odbora;*
- *blagajnički izvještaj;*
- *knjiga izdatih i primljenih čekova;*

- *blagajnički blokovi uplata i isplata;*
- *registar sa hronološkim redom brojeva novčanih i transakcijskih računa;*
- *knjiga zaduženja članskih karti, markica, ribolovnih dozvola i drugih obrazaca;*
- *knjiga inventure i arhive;*
- *kao i druge knjige po potrebi.*

XVI - OPŠTA AKTA UGSR „BISTRO“ ZENICA

Član 27.

UGSR „Bistro“ Zenica donosi slijedeća opšta i pojedinačna akta:

- *Statut;*
- *Pravilnike;*
- *Poslovnike;*
- *Odluke i zaključke;*
- *Planove i programe;*
- *Finansijske planove i programe.*

Svaki organ Udruženja donosi opšte i pojedinačne akte prema svojoj nadležnosti utvrđenim ovim Statutom.

XVII - PRESTANAK RADA UGSR „BISTRO“ ZENICA

Član 28.

Udruženje prestaje sa radom:

- *na način utvrđen Zakonom o udruživanju i iz razloga izraženom voljom osnivača;*
- *odluku o prestanku rada donosi Skupština Udruženja.*

Odluka o prestanku rada obavezno se utvrđuje i razgraničavaju prava i obaveze po osnivačima tj. diobni bilans i obaveze Udruženja.

XVIII - PRELAZNE I ZAVRŠNE ODREDBE

Član 29.

Tumačenje odredaba Statuta daje Skupština uz pribavljeno mišljenje Upravnog odbora.

Član 30.

Statut i njegove odredbe stupaju na snagu danom donošenja i usvajanja na Skupštini, a primjenjivat će se od dana upisa u registar Ministarstva za pravosuđe i uprave ZE-DO kantona.

Član 31.

Udruženje je dužno u roku od 6 mjeseci normativna akta donijeti i uskladiti sa odredbama Statuta.

Član 32.

Sve što nije regulisano ovim Statutom na snazi su odredbe Zakona o udruženjima i fondacijama, Zakona o slatkovodnom ribarstvu F BiH, Zakona o obligacionim odnosima, kao i ostalim Zakonima i zakonskim propisima koji regulišu poslovanje na ribolovnim vodama.

Član 33.

Statut je usvojen ako je za njega glasalo 2/3 prisutnih zastupnika u Skupštini Udruženja. Izmjene i dopune Statuta obavljaju se u potpunosti na identičan način kao i samo donošenje Statuta.

U Zenici, 23.05.2017. godine

Broj: 32-05/17

**UGSR „ BISTRO „ ZENICA
PREDSJEDNIK SKUPŠTINE**